

## Y COLECTAU

### “SUL Y FAM”

Dduw tosturi, y bu i'th Fab Iesu Grist, plentyn Mair, gyfranogi o fywyd cartref yn Nasareth, ac a ddygodd y teulu dynol cyfan ato'i hun ar y groes, cryfha ni yn ein byw beunyddiol fel y gallwn, mewn llawenydd ac mewn gofid, brofi nerth dy bresenoldeb i rwymo ynghyd ac i iacháu; trwy Iesu Grist ein Harglwydd. Amen.

### PUMED SUL Y GARAWYS: TYMOR Y DIODDEFAIN YN DECHRAU

Drugarocaf Dduw, a waredaist ac a achubaist y byd drwy angau ac atgyfodiad dy Fab Iesu Grist: caniatâ i ni drwy ffydd ynddo ef a ddiodefodd ar y groes, orfoleddu yn nerth ei fuddugoliaeth; trwy Iesu Grist, ein Harglwydd, sy'n fyw ac yn teyrnasu gyda thi, yn undod yr Ysbryd Glân, yn un Duw, yn awr ac am byth. Amen.

### SUL Y BLODAU A DYDD IAU CABLYD

Hollalluog a thragwyddol Dduw, a anfonaist dy Fab ein Hiachawdwr Iesu Grist o'th gariad tyner at yr hil ddynol i gymryd ein cnawd ac i ddiodefod angau ar y groes, caniatâ inni ddilyn esiampl ei amynedd a'i ostyngeddwydd a bod hefyd yn gyfrannog o'i atgyfodiad; trwy Iesu Grist ein Harglwydd, sy'n fyw ac yn teyrnasu gyda thi, yn undod yr Ysbryd Glân. Amen.

### DYDD GWENER Y GROGLITH

Hollalluog Dad, edrych yn drugarog ar dy deulu yma y bu Iesu Grist ein Harglwydd yn barod i gael ei fradychu er ei fwyn a'i draddodi i ddwylo pechaduriaid a diodefod angau ar y groes; sy'n fyw ac wedi ei ogoneddu gyda thi a'r Ysbryd Glân, yn un Duw, yn awr a hyd byth. Amen.

### DYDD Y PASG

Arglwydd pob bywyd a nerth, gorchfygaist hen drefn pechod a marwolaeth drwy atgyfodiad nerthol dy Fab er mwyn gwneud pob peth yn newydd ynddo ef: caniatâ i ni, sy'n farw i bechod, ac yn fyw i ti yn Iesu Grist, deyrnasu gydag ef mewn gogoniant; bydded iddo gyda thi a'r Ysbryd Glân glod a moliant, gogoniant a gallu, yn awr ac yn dragwyddol. Amen.

### AIL SUL Y PASG

Dad hollalluog, rhoddaist dy unig Fab i farw dros ein pechodau ac i gyfodi drachefn i'n cyfiawnhau: caniatâ i ni fwrw ymaith surdoes malais a drygioni er mwyn inni dy wasanaethu'n wastadol mewn purdeb bywyd a gwirionedd; trwy haeddiannau dy Fab Iesu Grist ein Harglwydd sy'n fyw ac yn teyrnasu gyda thi, yn undod yr Ysbryd Glân, yn un Duw, yn awr ac am byth. Amen.

### TRYDYDD SUL Y PASG

Hollalluog Dad, a wnaethost yn dy drugaredd mawr y disgyblion yn llawen o weld yr Arglwydd atgyfodedig: dyro inni'r fath adnabyddiaeth o'i bresenoldeb, fel y cawn ein hatgyfnerthu a'n cynnal gan ei fywyd atgyfodedig, a'th wasanaethu'n barhaus mewn cyfiawnder a gwirionedd; trwy Iesu Grist ein Harglwydd, sy'n fyw ac yn teyrnasu gyda thi a'r Ysbryd Glân, yn un Duw, yn awr ac am byth. Amen.

## **PEDWERYDD SUL Y PASG**

Hollalluog Dduw, dy Fab Iesu Grist yw'r atgyfodiad a'r bywyd: cyfoda ni, sy'n ymddiried ynddo ef, o farwolaeth pechod i fywyd cyfiawnder, fel y ceisiwn y pethau hynny sydd uchod lle y mae ef yn teyrnasu gyda thi yn undod yr Ysbryd Glân, yn un Duw, yn awr a hyd byth. Amen.

## **PUMED SUL Y PASG**

Hollalluog Dduw, a orchfygaist angau trwy dy uniganedig Fab ac a agoraist i ni borth y bywyd tragwyddol: bydded i'th ras ein rhagflaenu a dyro ddeisyfiadau da yn ein meddyliau fel y gallwn, trwy dy gymorth parhaus di, eu dwyn i berffeithrwydd cyflawn; trwy Iesu Grist ein Harglwydd atgyfodedig, sy'n fyw ac yn teyrnasu gyda thi, yn undod yr Ysbryd Glân, yn un Duw, yn awr ac am byth. Amen.

## **CHWECHED SUL Y PASG: Sul y Gweddïau**

O Dduw ein hiachawdwr, gwaredaist ni rhag galluoedd y tywyllwch a'n dwyn i deyrnas dy Fab: caniatâ iddo ef a'n galwodd ni'n ôl i fywyd trwy ei angau, ein cyfodi i lawenydd tragwyddol trwy ei bresenoldeb parhaus ynom ni; trwy Iesu Grist dy Fab ein Harglwydd, sy'n fyw ac yn teyrnasu gyda thi a'r Ysbryd Glân, yn un Duw, yn awr ac am byth. Amen.

## **DYDD IAU'R DYRCHAFael**

Hollalluog Dduw, fel yr ydym yn credu i'th unig-anedig Fab Iesu Grist ein Harglwydd esgyn i'r nef, gweddïwn arnat ganiatáu i ninnau ym meddylfryd ein calon ymddyrfafu a thrigo yno'n wastad gydag ef; sy'n fyw ac yn teyrnasu gyda thi a'r Ysbryd Glân, yn un Duw, yn awr ac am byth. Amen.

## **SEITHFED SUL Y PASG: Y Sul ar ôl Dydd Iau'r Dyrchafael**

O Dduw, Brenin y gogoniant, dyrchefaist dy unig Fab Iesu Grist â buddugoliaeth fawr i'th deyrnas yn y nefoedd: erfyniwn arnat beidio â'n gadael yn ddigysur, ond anfon dy Ysbryd Glân i'n nerthu ni a'n dyrchafu i'r fan lle'r aeth ein Hiachawdwr Crist o'n blaen, yr hwn sy'n fyw ac yn teyrnasu gyda thi a'r Ysbryd Glân, yn un Duw, yn awr ac am byth. Amen.

## **DYDD Y PENTECOST**

O Dduw, a ddysgaist yr adeg hon galonnau dy ffyddloniaid trwy anfon atynt oleuni dy Ysbryd Glân, dyro i ni drwy'r un Ysbryd feddu barn gywir ym mhob peth a llawenhau byth yn ei ddiddanwch sanctaidd; drwy haeddiannau Crist Iesu ein Gwaredwr, sy'n fyw ac yn teyrnasu gyda thi, yn undod yr Ysbryd Glân, yn un Duw, yn awr ac am byth. Amen.

## **SUL Y DRINDOD**

Hollalluog a thragwyddol Dduw, rhoddaist ras i ni dy weision, gan gyffesu ac arddel y wir ffydd, i gydnabod gogoniant y Drindod dragwyddol ac addoli'r Undod yn nerth y dwyfol fawredd: cadw ni'n ddiysgog yn y ffydd hon, a'n hamddiffyn byth rhag pob trallod; trwy Iesu Grist dy Fab ein Harglwydd, sy'n fyw ac yn teyrnasu gyda thi a'r Ysbryd Glân, yn un Duw, yn awr ac am byth. Amen.